

DIE BLOED VAN DIE LAM ONS OORWINNING



**GESKRYF DEUR
PASTOOR FRANCOIS JOUBERT**

INHOUD.

1. Die Bloed in die Skrif: Van Genesis tot Openbaring. BL. 3
2. Die Lam van God: Christus as die finale offer. BL. 6
3. Waarom die bloed? God se vereiste vir versoening. BL. 10
4. Die Krag van die Bloed: Wat dit vir ons beteken. BL. 14
5. Oorwinning deur die Bloed en die Woord
van ons Getuienis. BL. 18
6. Beskerming deur die Bloed:
Die Pasga en ons vandag. BL. 21
7. Vryspraak, Genesing en Heiligmaking deur die Bloed. BL. 25
8. Hoe om die Bloed toe te pas in jou lewe. BL. 29
9. Lewe in Oorwinning:
Die Getuienis van die Bloed in die Hemel. BL. 33

1. Die Bloed in die Skrif – Van Genesis tot Openbaring.

Van die eerste bladsy van die Bybel tot die laaste, loop daar 'n rooi draad – die bloed. Dit is nie net 'n simboliek nie. Dit is die diepste werklikheid van God se plan van redding vir die mens. Sonder die bloed is daar geen vergifnis van sondes nie.

HEBREËRS 9:22.

"En byna alles word met bloed gereinig volgens die wet, en sonder bloedvergieting vind daar geen vergifnis plaas nie."

Die eerste bloed: Genesis en die velklere.

Toe Adam en Eva in sonde geval het, het hulle hulself met blare probeer bedek. Maar God het velklere gemaak vir hulle.

GENESIS 3:21.

"En die HERE God het vir die mens en sy vrou rokke van vel gemaak en hulle dit aangetrek."

En vir so iets moes 'n dier sterf. Hier sien ons vir die eerste keer die konsep van plaasvervanging: onskuldige bloed wat vloei vir die sondaar.

Abel se offer: Aanvaar deur God.

In Genesis 4 sien ons dat Abel se offer – van die eersteling van sy kudde – deur God aanvaar is, terwyl Kain se graanoffer verwerp is. **Die boodskap is duidelik:** sonder die bloed is daar geen toegang tot God nie. Dit was nie die hoeveelheid of ywer nie, maar die aard van die offer wat tel.

Die bloed tydens die Uittog: Pasga.

In Eksodus 12 beveel God dat die Israëliete bloed aan hul deurposte moes smeer - die bloed van 'n geslagte lam. Hierdie teken sou die vernietigende engel verby hul huise laat gaan. Dit is 'n direkte heenwysing na Christus, die Lam van God wat ons red van die ewige dood.

OPENBARING 12:11.

"En hulle het Hom oorwin deur die bloed van die Lam en deur die woord van hulle getuienis..."

Die wet en die bloed: Levitikus.

Die hele offersisteen in Levitikus draai om bloed. Die sondoffer, skuldoffer, brandoffer - almal moes met bloed gepaard gaan. Die priester moes die bloed sprinkel op die altaar, want dit is deur die bloed wat versoening gedoen is vir die siel.

LEVITIKUS 17:11.

"Want die siel van die vlees is in die bloed, en Ek het dit aan julle op die altaar gegee om vir julle siele versoening te doen; want die bloed bewerk versoening deur die siel."

God se geregtigheid vereis dat sonde met bloed betaal word.

Die profesieë: Jesaja en ander.

Jesaja 53 vertel van die Knecht van die Here wat "**deurboor is vir ons oortredinge**" en "**met die straf wat vir ons vrede moes bring, was op Hom.**" Hierdie profesie beskryf die koms van 'n Lam wat gely het vir die oortredings van ander - 'n voorspelling van Jesus se kruisdood.

Die vervulling: Die kruis van Christus.

In die Nuwe Testament sien ons hoe die skaduwee in die Ou Testament vlees word in Jesus Christus.

Johannes die Doper roep uit.

JOHANNES 1:29.

"Kyk, die Lam van God wat die sonde van die wêreld wegneem!"

Christus sterf aan die kruis, en Sy bloed vloei - nie net vir Israel nie, maar vir die hele mensdom.

Die ewige getuie: Openbaring.

In Openbaring is die Lam nog steeds sentraal. Hy is die Een wat waardig is om die boekrol oop te maak (**Openbaring 5**). En die wat gered is, staan voor die troon, hul klere gewas in die bloed van die Lam.

OPENBARING 7:14.

"En ek sê vir hom: My heer, u weet dit. En hy sê vir my: Dit is hulle wat uit die groot verdrukking kom, en hulle het hul klere gewas en hul klere wit gemaak in die bloed van die Lam."

Die bloed het nie net 'n verlede betekenis nie - dit het 'n ewige getuienis in die hemel.

2. Die Lam van God – Christus as die Finale Offer.

1 KORINTHIËRS 5:7..

"Suiwer dan die ou suurdeeg uit, sodat julle 'n nuwe deeg kan wees—soos julle inderdaad ongesuurd is—want ook ons paaslam is vir ons geslag, naamlik Christus."

Die hele boodskap van die Evangelie kan opgesom word in een sin: **Jesus is die Lam van God wat geslag is vir ons sondes.**

In Hom word al die offers, profesieë en skaduwees van die Ou Testament vervul. Hy is nie maar net nog 'n leraar of profeet nie - **Hy is die volmaakte en finale offer.**

Die beginsel van die plaasvervangende offer.

Van vroeg af in die Skrif stel God die beginsel van plaasvervanging in: Iemand moet sterf vir die sonde. Maar wie is waardig? Geen mens of dier kon vir ewig versoening bring nie. Die bloed van bulle en bokke kon sondes net bedek - dit kon dit nie wegneem nie.

HEBREËRS 10:4.

"want die bloed van stiere en bokke kan onmoontlik die sonde wegneem."

Daarom moes daar 'n Lam wees sonder vlek of gebrek.

Nie net 'n volmaakte dier nie, maar 'n volmaakte mens. En net God self kon aan dié vereiste voldoen. So stuur Hy Sy Seun, Jesus Christus, in menslike gestalte, sonder sonde, om die offer te word vir alle mense.

Johannes die Doper se woorde.

Toe Johannes die Doper vir Jesus sien aankom, sê hy nie: **"Kyk die Messias"** of **"Kyk die Rabbi"** nie.

Hy sê.

JOHANNES 1:29.

"Die volgende dag sien Johannes Jesus na hom toe kom, en hy sê: **Dáár is die Lam van God wat die sonde van die wêreld wegneem!**"

Hierdie titel - Lam van God - wys op Sy offerwerk.

Johannes erken dat Jesus nie net gekom het om te leer of wonderwerke te doen nie, maar om te sterf. Nie net om te inspireer nie, maar om te red.

Die lyding van die Lam.

Jesus se lewe het in volkome gehoorsaamheid geëindig - selfs tot die dood aan 'n kruis.

FILIPPENSE 2:8.

"en in gedaante gevind as 'n mens, het Hy Homself verneder deur gehoorsaam te word tot die dood toe, ja, die dood van die kruis."

Hy is soos 'n lam na die slagting gelei, en Hy het nie Sy mond oopgemaak nie.

JESAJA 53:7.

"Hy is mishandel, hoewel Hy onderworpe was, en Hy het sy mond nie oopgemaak nie; soos 'n lam wat na die slagplek gelei word en soos 'n skaap wat stom is voor sy skeerders—ja, Hy het sy mond nie oopgemaak nie."

Sy lyding was nie net fisiek nie, maar ook geestelik en moreel.

- 1. Hy het die straf vir ons sonde gedra.*
- 2. Hy het ons skuld op Hom geneem.*
- 3. Hy het van die Vader verlate gevoel.*

MARKUS 15:34.

"En die negende uur het Jesus met 'n groot stem uitgeroep en gesê: Eloï, Eloï, lamma sabagtáni? wat, as dit vertaal word, beteken: My God, my God, waarom het U My verlaat?"

Hierdie lyding het die prys van ons vryheid geword.

Die volmaakte en finale offer.

Toe Jesus aan die kruis uitroep. "Dit is volbring" (Johannes 19:30), was dit nie 'n kreet van verslaentheid nie - dit was 'n oorwinningsverklaring. Die Griekse woord tetelestai beteken "volledig betaal". Die prys vir sondes is betaal. Geen verdere offer is meer nodig nie.

HEBREËRS 10:12.

"maar Hy het, nadat Hy een slagoffer vir die sondes gebring het, vir altyd gaan sit aan die regterhand van God."

Christus vervul die Pasga.

Die Pasga in Egipte het 'n volk tydelik gered. Christus, ons Paaslam, red ons vir ewig.

Die lam in Eksodus moes.

- 1. Sonder gebrek wees.*
- 2. Geslag word.*
- 3. Sy bloed moes toegepas word op die deurposte.*

Net so.

1. Jesus was sondeloos
2. Hy is gekruisig
3. Sy bloed moet "toegepas" word op die harte van dié wat glo

Die Lam as middelpunt van aanbidding.

In Openbaring sien ons miljoene engele en heiliges rondom die troon wat uitroep.

OPENBARING 5:12.

"en met 'n groot stem het hulle gesê: Die Lam wat geslag is, is waardig om te ontvang die krag en rykdom en wysheid en sterkte en eer en heerlikheid en lof."

Die fokus van die hemel is nie net op God as Skepper nie, maar op die Lam as die Verlosser. Dit bevestig dat die kruis die middelpunt van God se raadsplan is. Die Lam van God is nie maar net 'n beeld of 'n idee nie - **Hy is die fondament van ons verlossing.** Die bloed van die Lam is nie 'n simboliek nie, maar 'n geestelike werklikheid wat ons van sonde, skuld en ewige oordeel verlos.

3. Waarom die Bloed? God se Vereiste vir Versoening.

HEBREËRS 9:22.

"En byna alles word met bloed gereinig volgens die wet, en sonder bloedvergieting vind daar geen vergifnis plaas nie."

Die vraag ontstaan dikwels.

Waarom vereis God bloed? Waarom moes Jesus sterf, en waarom kon God ons nie eenvoudig net vergewe nie? Hierdie vraag raak die kern van God se karakter: Sy geregtigheid én Sy liefde.

Die heiligheid en geregtigheid van God.

God is heilig - dit beteken Hy is volkome rein en apart van sonde. Sy geregtigheid beteken dat Hy sonde nie kan ignoreer of verskoon nie. Elke sonde is 'n oortreding teen Hom as die Skepper en Regter van die heelal.

"Die siel wat sondig, dié moet sterwe." - Esegïël 18:4.

As God sonde net oor die hoof sou sien, sou Hy nie regverdig wees nie. Net soos 'n regter wat 'n moordenaar vrylaat, sou Hy dan nie regverdig kon wees nie. Die prys vir sonde is die dood - en daarom moes daar vergelding wees.

Die lewe is in die bloed.

LEVITIKUS 17:11.

"Want die siel van die vlees is in die bloed, en Ek het dit aan julle op die altaar gegee om vir julle siele versoening te doen; want die bloed bewerk versoening deur die siel."

Die bloed simboliseer en dra die lewe van 'n wese. Wanneer bloed vergiet word, beteken dit dat 'n lewe gegee is. Dit is waarom God bloed vereis - dit is nie die rooi vloeistof op sigself wat krag dra nie, maar dit wat dit verteenwoordig: die lewe wat geoffer word.

Die beginsel van versoening.

Die woord "**versoening**" beteken om vyande weer een te maak.

Sonde het skeiding gebring tussen God en mens.

JESAJA 59:2.

"maar julle ongeregthede het 'n skeidsmuur geword tussen julle en julle God, en julle sondes het sy aangesig vir julle verberg, sodat Hy nie hoor nie."

Maar deur 'n offer - een lewe wat vir 'n ander gegee word - kan versoening plaasvind.

In die Ou Testament moes priesters gereeld offers bring: diere wat geslag is, en wie se bloed op die altaar gesprinkel is. Maar dit was slegs tydelik - dit het vooruit gewys na iets groters: **die ewige versoening deur Christus.**

Die mens se totale onvermoë.

Geen mens kon homself red nie.

Ons goeie daad is soos 'n bevlekte kleed.

JESAJA 64:6.

"En ons het almal geword soos 'n onreine, en al ons geregtighede soos 'n besoedelde kleed; en ons het almal verdor soos blare, en ons ongeregthede het ons weggevoer soos die wind."

Selfs ons beste pogings kon nie die skuld van een enkele sonde uitwis nie.

Daarom moes iemand sondeloos - volkome - in ons plek sterf.

ROMEINE 3:23.

"Want almal het gesondig en dit ontbreek hulle aan die heerlikheid van God."

Die krag van Jesus se bloed.

Wat het Jesus se bloed dan bereik?

Alles. Dit het.

1. Versoening bewerk tussen God en mens.

ROMEINE 5:10.

Want as ons, terwyl ons nog vyande was, met God versoen is deur die dood van sy Seun, veel meer sal ons deur sy lewe gered word nou dat ons versoen is.

2. Vergifnis van sondes moontlik gemaak.

EFESIËRS 1:7.

"In Hom het ons die verlossing deur sy bloed, die vergifnis van die misdade na die rykdom van sy genade,"

3. Vryspraak gebring - soos in 'n hofsaak waar die beskuldigde onskuldig verklaar word.

ROMEINE 5:9.

"Veel meer dan sal ons, nou dat ons geregverdig is in sy bloed, deur Hom gered word van die toorn."

4. Reiniging van gewetens en siele.

HEBREËRS 9:14.

"hoeveel te meer sal die bloed van Christus, wat Homself deur die ewige Gees aan God sonder smet geoffer het, julle gewete reinig van dooie werke om die lewende God te dien."

5. Vrymoedigheid gegee om tot God te nader.

HEBREËRS 10:19.

"Terwyl ons dan, broeders, vrymoedigheid het om in die heiligdom in te gaan deur die bloed van Jesus."

God het nie die reëls gebuig om ons te red nie - Hy het self die prys betaal. Sy liefde het 'n pad gemaak sonder om sy geregtigheid in te boet.

Jesus se bloed is nie net die sentrale tema van verlossing nie - dit is die enigste weg tot vergifnis, die enigste bron van ware vrede, en die enigste fondament vir ons oorwinning. **Die kruis is nie 'n tragiese ongeluk nie** - dit was God se plan van redding, gebore uit Sy regverdige liefde.

4. Die Krag van die Bloed – Wat dit vir ons beteken.

OPENBARING 12:11.

"En hulle het hom oorwin deur die bloed van die Lam en deur die woord van hulle getuigenis, en hulle het tot die dood toe hulle lewe nie liefgehad nie."

Die bloed van Jesus is nie net 'n teologiese waarheid nie – dit is 'n lewende, werkende krag wat ons daaglik kan toepas en beleef. In hierdie hoofstuk kyk ons prakties en geestelik na wat die bloed van Jesus vir elke gelowige beteken.

Die Bloed bring Vergifnis.

EFESIËRS 1:7.

"In Hom het ons die verlossing deur sy bloed, die vergifnis van die misdade na die rykdom van sy genade,"

Daar is geen groter behoefte in die mens se siel as die vergifnis van sonde nie. Die skuld en las van sonde breek ons, maak ons siek, en skei ons van God. Maar die bloed van Jesus was die volle prys vir volkome vergifnis – **nie gedeeltelik nie, maar volkome!**

Vergifnis deur die bloed beteken dat.

1. Jou sonde nie net bedek is nie, dit is verwyder.
2. God onthou dit nie meer nie.

HEBREËRS 8:12.

"Want Ek sal barmhartig wees oor hulle ongeregtighede en aan hulle sondes en hulle oortredinge nooit meer dink nie."

3. Jy is vry van skuld en veroordeling.

ROMEINE 8:1.

"Daar is dan nou geen veroordeling vir die wat in Christus Jesus is nie, vir die wat nie na die vlees wandel nie, maar na die Gees."

Die Bloed Reinig Jou Gewete.

HEBREËRS 9:14.

"Daar is dan nou geen veroordeling vir die wat in Christus Jesus is nie, vir die wat nie na die vlees wandel nie, maar na die Gees."

Selfs wanneer ons weet ons is vergewe, kan ons gewete ons nog aankla.

Die duiwel is die "aanklaer van die broeders".

OPENBARING 12:10.

"Toe hoor ek 'n groot stem in die hemel sê: Nou het die heil en die krag en die koningskap die eiendom van onse God geword, en die mag van sy Christus; want die aanklaer van ons broeders is neergewerp, hy wat hulle aanklaag voor onse God, dag en nag."

Hy gebruik skuldgevoelens om kinders van God te verlam. Maar die bloed van Jesus reinig nie net jou rekord nie - dit reinig jou innerlike mens. Jy kan met 'n skoon gewete en vrymoedigheid voor God staan!

Die Bloed Bring Vryspraak en Regverdigmaking.

ROMEINE 5:9.

"Veel meer dan sal ons, nou dat ons geregverdig is in sy bloed, deur Hom gered word van die toorn."

Die bloed van Jesus bring ons in 'n wettige verhouding met God. Jy staan nie meer as 'n sondaar voor Hom nie, maar as regverdig verklaar - net soos in 'n hofsaak waar jy onskuldig bevind word. Jy is vry, nie omdat jy onskuldig is nie, maar omdat Jesus jou skuld op Hom geneem het!

4. Die Bloed bring Vrede met God.

KOLOSSENSE 1:20.

"en dat Hy deur Hom alles met Homself sou versoen nadat Hy vrede gemaak het deur die bloed van sy kruis—ek sê deur Hom—die dinge op die aarde sowel as die dinge in die hemele."

Baie mense soek innerlike vrede, maar ware vrede begin by vrede met God. Wanneer ons deur die bloed van Jesus met God versoen is, vind ons innerlike vrede, want die stryd tussen ons en God is verby.

5. Die Bloed Bring Oorwinning oor die Vyand.

OPENBARING 12:11.

"En hulle het hom oorwin deur die bloed van die Lam en deur die woord van hulle getuienis, en hulle het tot die dood toe hulle lewe nie liefgehad nie."

Die duiwel het geen antwoord op die bloed nie. Hy kan jou aankla, dreig en probeer vernietig, maar wanneer jy staan in die waarheid van die bloed van Jesus, het jy oorwinning.

Die bloed van Jesus is jou geestelike wapen.

- 1.** Dit beskerm jou teen veroordeling.
- 2.** Dit gee jou gesag in gebed.
- 3.** Dit bring vryheid van demoniese invloed.
- 4.** Dit herinner Satan dat hy reeds oorwin is!

6. Die Bloed Maak Heilig en Reinig.

HEBREËRS 13:12.

"Daarom het Jesus ook, om die volk deur sy eie bloed te heilig, buitekant die poort gely."

Heiligmaking beteken om afgesonder te wees vir God se doel. Die bloed van Jesus werk nie net om sonde te vergewe nie - dit verander ons van binne af. Dit stel ons in staat om 'n lewe van oorwinning, reinheid en toewyding te leef.

Die Krag van die Bloed vandag.

Die bloed van Jesus is nie beperk tot 'n gebeurtenis in die verlede nie.

Dit spreek vandag nog.

HEBREËRS 12:24.

"en by Jesus, die Middelaar van die nuwe testament, en die bloed van die besprenkeling wat van beter dinge spreek as Abel."

Abel se bloed het gewreek geroep, maar Jesus se bloed roep versoening, genade en oorwinning.

Dit is 'n lewende krag wat.

1. Spreek van jou vryheid.
2. Spreek van jou identiteit in Christus.
3. Spreek van God se ewige liefde.

Die bloed van die Lam is nie net jou toegang tot die hemel nie - dit is jou sleutel tot oorwinning op aarde. Wanneer jy jou posisie verstaan in die bloed van Jesus, begin jy leef nie as 'n slagoffer nie, **maar as 'n meer as oorwinnaar!**

5. Oorwinning deur die Bloed en die Woord van ons Getuienis.

OPENBARING 12:11.

"En hulle het hom oorwin deur die bloed van die Lam en deur die woord van hulle getuienis, en hulle het tot die dood toe hulle lewe nie liefgehad nie."

Hierdie vers is een van die mees kragtige verklarings van oorwinning in die hele Bybel. Dit wys ons nie net dat daar oorwinning is nie, maar ook hoe daardie oorwinning behaal word: **deur die bloed van die Lam, en die woord van ons getuienis.**

Die vyand van die gelowige.

In Openbaring 12 sien ons 'n geestelike stryd: Satan word uitgewerp, en hy vervolg die kinders van God. Hy is die "aanklaer **van die broeders**" - hy bring voortdurend beskuldigings teen die kinders van God. Sy doel is om jou te ontmoedig, te verlam en van jou identiteit in Christus te beroof.

Maar God het 'n wapentuig vir hierdie oorlog gegee - en dit is nie vleeslike wapens nie, maar geestelike kragbronne: **die bloed van Jesus en die getuienis van geloof.**

Wat beteken dit om te oorwin deur die bloed?

Om te oorwin "deur die bloed van die Lam" beteken.

1. Jy aanvaar die bloed as jou enigste grond vir regverdigheid.

2. Jy staan vas teen veroordeling, skuld en vrees - omdat Jesus se bloed reeds die prys betaal het.

3. Jy herinner jouself en die vyand daaraan dat jou sonde vergewe is, dat jy vrygemaak is, en dat jy nou in Christus is.

Die bloed van Jesus is nie 'n ritueel of 'n konsep nie - dit is jou geestelike reg. Wanneer jy dit bely en daarop staan, raak dit jou skild in die stryd.

Die woord van ons getuienis.

Wat beteken "die woord van hulle getuienis"?

Dis nie net 'n getuienis van wat God vroeg in jou lewe gedoen het nie - dit is 'n voortdurende belydenis van wat jy glo oor Jesus, **Sy bloed, en jou posisie in Hom.**

HEBREËRS 10:23.

"Laat ons die belydenis van die hoop onwankelbaar vashou, want Hy wat dit beloof het, is getrou;"

Ons oorwin deur.

1.Die getuienis van die Woord: wanneer ons verklaar wat God sê, nie wat ons voel nie.

2.Die getuienis van ons lewe: wanneer ons dade ooreenstem met ons geloof.

3.Die getuienis in teenstand: wanneer ons in moeilike tye steeds vashou aan Christus.

Elke keer as jy sê: **"Ek is vrygemaak deur die bloed van Jesus,"** beveg jy 'n leuen. Elke keer as jy sê: **"Ek behoort aan God,"** verbreek jy die mag van skuld en vrees. Elke keer as jy sê: **"Ek is nie meer 'n slaaf nie, ek is 'n kind van God,"** verklaar jy oorlog teen die duisternis.

Hulle het hulle lewe nie liefgehad tot die dood toe nie

Hierdie laaste frase wys vir ons die radikale toewyding van die gelowiges wat oorwin het.

Hulle het oorwin omdat hulle.

1. Nie aan hierdie wêreld vasgehou het nie.
2. Nie vir hulleself geleef het nie.
3. Bereid was om alles vir Jesus te gee - selfs hul lewe.

Ware oorwinning lê nie in gemak nie, maar in getrouheid - selfs tot die einde. Ons is nie net geroep om te leef deur die bloed nie, maar ook om te sterf aan onself, sodat Christus in en deur ons kan leef.

Praktiese toepassing van hierdie oorwinning.

Hoe pas ons hierdie waarheid toe in ons daaglikse lewe?

1. **In gebed:** "Vader, ek kom na U deur die bloed van Jesus. Ek weet ek is aanvaar en rein."
2. **In versoeking:** "Ek is vrygemaak - ek hoef nie meer die ou lewe te dien nie."
3. **In beproewing:** "Die bloed het my verseker van God se liefde - ek sal nie wankel nie."
4. **In geestelike stryd:** "Ek weerstaan die vyand in die Naam van Jesus, deur Sy bloed."
5. **In getuienis aan ander:** "Ek wil vertel van wat Jesus gedoen het - Hy het my gered!"

Die bloed van die Lam en die woord van ons getuienis is saam 'n tweesnydende swaard. Die bloed geef jou gesag, en die getuienis aktiveer daardie gesag.

So staan ons, dag vir dag, in die oorwinning wat Jesus reeds vir ons behaal het.

6. Beskerming deur die Bloed – Die Pasga en Ons Vandag.

EKSODUS 12:13.

"Maar die bloed sal vir julle 'n teken wees aan die huise waarin julle is: as Ek die bloed sien, sal Ek by julle verbygaan. En daar sal geen verderflike plaag onder julle wees wanneer Ek Egipteland tref nie."

Een van die mees betekenisvolle voorbeelde van die krag van die bloed in die Bybel is die Pasga (Hebreeus: Pesach), waar die bloed van 'n lam fisieke en geestelike beskerming gebring het. Hierdie gebeurtenis is nie net 'n historiese feit nie – dit is 'n profetiese beeld van die werk van Jesus Christus aan die kruis, en 'n geestelike waarheid wat ons vandag nog kan toepas.

Die Pasga: God se beskerming teen oordeel.

Die tiende plaag in Egipte was die dood van elke eersgeborene.

Maar God het vir Israel 'n ontsnappingsplan gegee.

1. 'n Lam moes sonder gebrek geslag word.
2. Die bloed moes op die deurposte en balk gestryk word.
3. Elke huis waar die bloed was, sou gespaar word.

Let op: dit was nie die moraliteit van die mense in die huis wat hulle beskerm het nie – dit was die teenwoordigheid van die bloed.

Waar daar bloed was, was daar beskerming.

Christus as ons Pasga-lam.

1 KORINTHIËRS 5:7.

"Suiwer dan die ou suurdeeg uit, sodat julle 'n nuwe deeg kan wees—soos julle inderdaad ongesuurd is—want ook ons paaslam is vir ons geslag, naamlik Christus."

Jesus is die ware vervulling van die Pasga.

1. Hy is sonder sonde (sonder gebrek).
2. Hy is geslag aan die kruis.
3. Sy bloed is vir ons gestort - en dit is toe ons beskerming teen oordeel, vernietiging, en die mag van die vyand.

Die Pasga was 'n beeld, maar Jesus is die werklikheid.

Die bloed as grens van beskerming.

Toe die vernietigende engel deur Egipte gegaan het, het hy gehoor gegee aan die grens van die bloed. Die bloed het vir hom gesê: **"Jy mag nie ingaan nie."**

So ook vandag - die bloed van Jesus stel 'n geestelike grens wat die vyand nie mag oorsteek nie. Wanneer ons die bloed toepas oor ons lewens, gesinne, eiendom en roeping, roep ons daardie beskerming op grond van God se verbond.

PSALM 32:7.

"Jy is 'n skans vir my, U beskut my op die dag van benoudheid."

Hoe pas ons die bloed toe?

In die Ou Testament is die bloed letterlik met 'n hisoptakkie op die deur gestryk.

In die Nuwe Verbond pas ons die bloed toe deur geloof en belydenis.

1. Bid: "Vader, ek pleit die bloed van Jesus oor my huis en familie."

2. Bely: "Ek is beskerm deur die bloed van die Lam - geen wapen wat teen my gesmee word, sal voorspoedig wees nie."

3. Vertrou: Jy staan nie op jou eie krag of werke nie, maar op die krag van Jesus se volmaakte offer.

Ons pleit nie die bloed as 'n vorm van magie nie, maar as 'n belydenis van geloof in die verbond.

Praktiese voorbeelde van beskerming.

1. Geestelike aanvalle: Die bloed van Jesus is jou skild teen demoniese aanvalle.

2. Gebed vir jou gesin: "Ek bedek my kinders met die bloed van Jesus - hulle behoort aan Hom."

3. Tydens gevaar: "Here, ek vertrou op die bloed van Jesus - my lewe is veilig in U hand."

4. Tydens siekte of pandemie: Die bloed is 'n herinnering dat Jesus ook ons genesing bewerk het (Jesaja 53:5).

Die bloed roep: "Gaan verby!"

Die woord "**Pasga**" beteken letterlik "**voorbygaan**" - dit is God se teenwoordigheid wat oordeel verby laat gaan. In Christus het ons nou 'n permanente Pasga.

ROMEINE 8:1.

"Daar is dan nou geen veroordeling vir die wat in Christus Jesus is nie."

*Elke keer as die vyand jou probeer vernietig, en jy verklaar die bloed van Jesus, is dit asof God sê: **"Gaan verby - dié behoort aan My!"***

Slotgedagtes.

*Die bloed van die Lam is nie net vir vergifnis nie, maar ook vir beskerming. Dit is 'n geestelike waarborg dat ons veilig is onder die hand van God. Soos die Israeliete in Egipte, staan ook ons vandag onder die teken van die bloed - **en dit is ons waarborg van oorwinning en veiligheid.***

7. Vryspraak, Genesing en Heiligmaking deur die Bloed.

Die bloed van Jesus het veel meer vir ons bewerk as net vergifnis. Dit is die bron van ons vryspraak, genesing, en heiligmaking. Die krag van die bloed reik na elke aspek van die mens - **liggaam, siel, en gees** - en bring volkome herstel.

Vryspraak deur die bloed: Vry van skuld, regverdig voor God.

ROMEINE 5:9.

"omdat ons weet dat Christus, nadat Hy opgewek is uit die dode, nie meer sterf nie. Die dood heers oor Hom nie meer nie."

Om "**geregverdig**" te wees, beteken dat jy in 'n wettige verhouding met God staan. Dis soos in 'n hofsaak waar die Regter verklaar: "**Jy is onskuldig.**" Jy is nie net vergewe nie - jy is vrygespreek. God sien jou as regverdig, want Jesus se geregtigheid is aan jou toegereken.

Die bloed het.

1. Jou rekord skoongegee
2. Jou posisie verander
3. Jou toegang tot God oopgemaak

HEBREËRS 4:16.

"Laat ons dan met vrymoedigheid na die troon van die genade gaan, sodat ons barmhartigheid kan verkry en genade vind om op die regte tyd gehelp te word."

As jy weet jy is vrygespreek deur die bloed, leef jy nie meer onder skuld, skaamte of vrees nie.

Jy leef in vrymoedigheid en vrede.

Genesing deur die bloed: Herstel vir liggaam en siel.

JESAJA 53:5.

"Maar Hy is ter wille van ons oortredinge deurboor, ter wille van ons ongeregtighede is Hy verbrysel; die straf wat vir ons die vrede aanbring, was op Hom, en deur sy wonde het daar vir ons genesing gekom."

1 PETRUS 2:24.

"wat self ons sondes in sy liggaam op die kruishout gedra het, sodat ons die sondes kan afsterwe en vir die geregtigheid lewe; deur wie se wonde julle genees is."

Die liggaam van Jesus is gebreek, geslaan, deurboor - en Sy bloed het gevloei - sodat ons genees kon word. Genesing is nie net emosioneel of geestelik nie; dit sluit ook fisiese herstel in.

Daar is genesing.

- 1.** Vir liggaamlike siekte.
- 2.** Vir 'n gebroke hart (Psalm 147:3).
- 3.** Vir 'n verwonde gees (Jesaja 61:1).

Wanneer jy die bloed van Jesus verstaan en toepas, kan jy bid met geloof en sê: **"Deur U bloed, Here Jesus, is ek genees - ek ontvang dit met geloof."**

Heiligmaking deur die bloed: Afgesonder vir God se doel.

HEBREËRS 13:12.

"Daarom het Jesus ook, om die volk deur sy eie bloed te heilig, buitekant die poort gely."

Heiligmaking beteken om afgesonder te wees vir God - afgesonder van die wêreld, van sonde, en vir Sy doel. Die bloed van Jesus reinig ons nie net nie - dit verander ons identiteit.

1 THESSALONISENSE 4:3.

"Want dit is die wil van God: julle heiligmaking; dat julle jul moet onthou van die hoerery;"

Die bloed van Jesus.

- 1. Sny ons af van ons ou lewe.*
- 2. Verander ons van slawerny tot seunskap.*
- 3. Werk saam met die Heilige Gees om ons karakter te hervorm.*

Heiligmaking is nie net 'n posisie nie - dis ook 'n proses.

Maar dit begin en word gedra deur die krag van die bloed.

Drievoudige werk van die bloed.

Die bloed van Jesus werk op drie vlakke.

Vlak.

Werk van die Bloed.

Regsposisie.

Vryspraak en regverdiging - ons staan reg voor God

Liggaam.

Genesing en herstel - ons ontvang fisiese en

Vlak.

Werk van die Bloed.

innerlike genesing

Heiliging

Afsondering en groei - ons word gevorm in Christus se beeld

Wanneer ons hierdie drie aspekte verstaan, leef ons nie net gered nie - **ons leef volledig vry!**

Hoe om hierdie waarhede toe te pas.

1. Dank God daagliks vir die bloed: "Dankie Jesus vir U bloed wat my skoonwas, genees en heilig."

2. Bely die Woord: "Ek is geregverdig deur die bloed. Ek is genees deur die wonde van Christus. Ek is geheilig deur die bloed van die Lam."

3. Leef dit uit: Moenie net hoor en glo nie - leef asof dit waar is. Jy is nie meer wie jy was nie!

Slotgedagtes.

Die bloed van die Lam is genoeg - genoeg om jou te red, te genees, te reinig, te herstel, en te vorm. Dit is die volmaakte werk van Christus wat jou roep na 'n lewe van oorwinning. Die wêreld kan nie hierdie vryheid gee nie, en die vyand kan dit nie wegneem nie.

Jy is gereinig, genees en geheilig deur die bloed - leef in daardie waarheid!

8. Hoe om die Bloed toe te pas in jou lewe.

OPENBARING 12:11.

"En hulle het hom oorwin deur die bloed van die Lam en deur die woord van hulle getuigenis, en hulle het tot die dood toe hulle lewe nie liefgehad nie."

Om te weet dat die bloed van Jesus kragtig is, is een ding. Maar om die bloed van Jesus prakties toe te pas in jou daaglikse lewe, is iets anders. Baie gelowiges weet van die bloed, maar leef nie in die volle voordele daarvan nie, omdat hulle dit nie bewustelik en gelowig toepas nie.

In hierdie hoofstuk leer ons hoe om die bloed van Jesus daaglik toe te pas - met geloof, begrip en volharding.

Wat beteken dit om die bloed "toe te pas"?

In Eksodus 12 moes die Israëliete die bloed van die lam op die deurposte aanwend. Hulle het dit nie net geslag en binne gehou nie - hulle het dit uitwendig toegepas. Die vernietigende engel het nie in die huis gekyk of hulle die lam geëet het nie - hy het net gekyk of daar bloed aan die deur was.

So is dit ook met ons.

1. Geloof in die bloed is nie net 'n innerlike saak nie.
2. Ons moet dit verklaar, bely, en toepas in spesifieke situasies.

Toepassing deur geloof en belydenis.

2 KORINTHIËRS 4:13.

"En omdat ons dieselfde Gees van die geloof het—soos geskrywe is: Ek het geglo, daarom het ek gespreek—glo ons ook, daarom spreek ons ook."

Ons "pas" die bloed van Jesus vandag **deur ons mond** - deur geloofsbelydenis. Dis nie net 'n ritueel nie - **dis 'n aktiewe geloofshandeling.**

Voorbeelde van geloofsbelydenis.

1. "Ek is gereinig deur die bloed van Jesus - ek is vergewe."
2. "Ek pleit die bloed van Jesus oor my kinders en my huis."
3. "Die vyand het geen mag oor my nie - ek is bedek onder die bloed."
4. "Deur die bloed van Jesus het ek vrymoedigheid om na God te kom."
5. "Ek is genees deur die wonde van Jesus - die bloed spreek lewe oor my liggaam."

Gebiede waarin jy die bloed kan toepas.

a). Jou hart en gewete.

Gebruik die bloed om jou gewete skoon te maak van skuld en veroordeling.

"Here, ek kom na U deur die bloed van Jesus. Ek aanvaar U vergifnis."

b). Jou gesin.

Spreek beskerming en redding oor jou geliefdes uit.

"Ek verklaar die bloed van Jesus oor elkeen in my huis - U beskerm ons."

c). Tydens aanvalle van die vyand.

Pleit die bloed teen demoniese invloede, vrees, angs of geestelike swaarkry.

"Satan, jy het geen reg oor my nie - ek is gekoop met die bloed van Jesus."

d). Jou denke en emosies.

Wanneer jy oorweldig word met twyfel, depressie of verwarring, verklaar:

"My denke word vernuwe - ek is vry van vrees en leuens deur die bloed."

e). Jou roeping en bediening.

Wei toe jou bediening aan God onder die bloed.

"Here, ek pleit die bloed van Jesus oor my bediening - ek wil U verheerlik."

6. Gebruik die bloed in gebed.

Begin jou gebed met geloof in die bloed van Jesus:

"Vader, ek dank U vir die bloed van Jesus. Ek kom nie op grond van my werke nie, maar op grond van Sy volmaakte offer. Ek staan skoon, vry en aanvaar in U teenwoordigheid."

Sluit jou gebed af met 'n verklaring van oorwinning:

"Ek dank U dat ek alles ontvang het deur die bloed van die Lam - vergifnis, beskerming, genesing, en vrede."

7. Die sleutel: Bly wandel in die lig.

1 JOHANNES 1:7.

"Maar as ons in die lig wandel soos Hy in die lig is, dan het ons gemeenskap met mekaar; en die bloed van Jesus Christus, sy Seun, reinig ons van alle sonde."

Om die bloed effektief toe te pas, moet jy in die lig van God se waarheid wandel - eerlik, opreg, en gewillig om te gehoorsaam. Die bloed werk saam met jou wandel. Dit is nie 'n lisensie om in sonde te leef nie - **dis krag om in oorwinning te leef!**

Slotgedagtes.

Die bloed van Jesus is jou grootste wapen, jou diepste anker, en jou sekerste fondament. Dit werk nie outomaties nie - dit werk deur geloof en belydenis. Deur jou mond en jou lewe verklaar jy:
"Ek leef onder die bloed van die Lam."

9. Lewe in Oorwinning – Die Getuienis van die Bloed in die Hemel.

OPENBARING 12:11.

"En hulle het hom oorwin deur die bloed van die Lam en deur die woord van hulle getuienis, en hulle het tot die dood toe hulle lewe nie liefgehad nie."

Ons het begin met die waarheid dat die bloed van Jesus ons oorwinning is. Maar in hierdie laaste hoofstuk kyk ons na 'n ewige perspektief – hoe die bloed van Jesus nie net op aarde werk nie, maar ook in die hemel getuig, en hoe dit ons aanmoedig om in volgehoue oorwinning te leef.

Die bloed het 'n stem in die hemel.

HEBREËRS 12:24.

en by Jesus, die Middelaar van die nuwe testament, en die bloed van die besprenkeling wat van beter dinge spreek as Abel.

Die bloed van Abel het wraak uitgeroep – maar die bloed van Jesus roep genade, vergifnis en versoening uit. Hierdie stem klink voortdurend in die hemelse heiligdom.

Wanneer jy as gelowige sondig, val, of struikel, is daar reeds 'n getuienis in die hemel wat namens jou spreek – die bloed van Jesus.

Christus is ons hemelse Hoëpriester.

HEBREËRS 9:24.

"Want Christus het nie ingegaan in 'n heiligdom met hande gemaak, 'n teëbeeld van die ware nie, maar in die hemel self om nou voor die aangesig van God vir ons te verskyn;"

Die bloed van Jesus is nie net op Golgota gestort nie - dit is ingedra in die hemelse tabernakel, waar dit altyd voor die Vader getuig. Die offer is voltooi, maar die effek daarvan is ewig aktief.

Jesus self is jou voorspraak - en Sy bloed is die bewys.

Die vyand se aanklagte word stilgemaak.

OPENBARING 12:10.

"Toe hoor ek 'n groot stem in die hemel sê: Nou het die heil en die krag en die koningskap die eiendom van onse God geword, en die mag van sy Christus; want die aanklaer van ons broeders is neergewerp, hy wat hulle aanklaag voor onse God, dag en nag."

Satan se strategiese aanval is dikwels om jou te aankla, te herinner aan jou verlede, en jou waardigheid in Christus te ondermyn.

Maar jy het 'n verdediging wat altyd geld.

1. Jy is nie regverdig op grond van jou dae nie.

2. Jy is regverdig op grond van Sy bloed.

*Elke keer as die vyand aankla, weerklink die stem van die bloed:
"Betaal. Vrygespreek. Verlos."*

Leef op aarde soos 'n oorwinnaar.

Omdat die bloed van Jesus in die hemel getuig, mag ons op aarde.

- 1. Met vrymoedigheid leef.*
- 2. Vrede in ons gewete hê.*
- 3. Volhardend bid.*
- 4. Met sekerheid teen die vyand staan.*
- 5. Hoop hê in elke situasie.*

Oorwinning is nie net 'n gevoel of 'n ervaring nie - dis 'n geestelike werklikheid wat jy in geloof toepas.

Jou lewe moet die getuienis bevestig.

OPENBARING 12:11.

"En hulle het hom oorwin deur die bloed van die Lam en deur die woord van hulle getuienis, en hulle het tot die dood toe hulle lewe nie liefgehad nie."

Die bloed getuig in die hemel. Nou moet jou lewe getuig op die aarde.

Jy bevestig daardie getuienis deur.

- 1. Jou woorde.*
- 2. Jou geloofsdaad.*
- 3. Jou heilige wandel.*
- 4. Jou getrouheid aan Christus, selfs in beproewing.*

Elke keer as jy getuig van Jesus - getuig jy van die krag van Sy bloed.

Slotgedagtes.

Die bloed van die Lam is genoeg - vir jou verlossing, jou versoening, jou beskerming, en jou oorwinning. Dit spreek in die hemel. Dit moet spreek uit jou mond. En dit sal spreek tot in die ewigheid.

Jy hoef nie nederlaag te aanvaar nie. Die bloed is reeds gestort. Die pad is oop. Die getuie spreek.

Jy is oorwinnaar - deur die bloed van die Lam.
